



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 14. stav (1) Zakona o finansiranju političkih stranaka («Službeni glasnik BiH» broj 22/00, 102/09 i 54/10), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06), a u skladu sa članom 18. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

IZVJEŠTAJ O REVIZIJI  
GODIŠNJEG FINANSIJSKOG IZVJEŠTAJA ZA 2009. GODINU  
NAŠE STRANKE

Broj: 03-07-6-89/10  
Sarajevo, 18.02.2011. godine

## SADRŽAJ:

MIŠLJENJE REVIZORA .....	3
1. UVOD .....	3
2. PREDSTAVLJANJE POLITIČKE STRANKE .....	4
3. OPIS REVIZIJE .....	4
Predmet revizije .....	5
Cilj revizije .....	5
Obim revizije .....	5
4. PRETHODNE REVIZIJE .....	5
5. NALAZI I PREPORUKE .....	5
5.1. NALAZI .....	5
5.2. PREPORUKE .....	9

## MIŠLJENJE REVIZORA

Služba za reviziju finansiranja političkih stranaka je izvršila reviziju godišnjeg finansijskog izvještaja Naše stranke za 2009. godinu.

Rukovodstvo stranke je odgovorno za finansijske izvještaje, postupanje u skladu sa Zakonom o finansiranju političkih stranaka i uspostavljanje efikasnog sistema internih kontrola. Naša odgovornost je da izrazimo mišljenje na osnovu revizije koju smo izvršili.

Reviziju smo obavili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garancije da je stranka postupala u skladu sa Zakonom o finansiranju političkih stranaka.

Revizija je na osnovu uzoraka ispitivala značajne transakcije koje potvrđuju iznose u finansijskom izvještaju, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

**Revizijom smo utvrdili da Naša stranka u izvještajnom periodu nije postupila u skladu sa odredbama člana 6., člana 8. stav (1) i člana 11. stav (1) i stav (3) Zakona o finansiranju političkih stranaka.**

**Prema našem mišljenju, osim navedenog, revidirani finansijski izvještaji ukazuju da je Naša stranka u 2009. godini postupala u skladu sa odredbama Zakona o finansiranju političkih stranaka.**

## 1. UVOD

Služba za reviziju finansiranja političkih stranaka izvršila je reviziju godišnjeg finansijskog izvještaja Naše stranke za 2009. godinu.

Revizija je preduzeta u skladu sa članom 14. stav (1) Zakona o finansiranju političkih stranaka («Službeni glasnik BiH» broj 22/00, 102/09 i 54/10), članom 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08).

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Naša stranka je ostvarila prihod u iznosu od 185.966,29 KM, što je iskazano u narednoj tabeli:

Red.br.	Vrsta prihoda	Iznos u KM	Učešće u ukupnom prihodu %
1	Članarina	15.096,68	8,12%
2	Prilozi fizičkih lica	13.688,81	7,37%
3	Prilozi pravnih lica	605,00	0,33%
4	Prihodi od imovine	0,00	0,00%
5	Prihodi od pr.lica	0,00	0,00%
6	Prihodi od poklona	138,00	0,07%
7	Prihodi iz budžeta	149.743,44	80,59%
8	Ostali prihod	6.538,79	3,52%
	<b>Ukupni prihodi:</b>	<b>185.810,72</b>	<b>100,00%</b>

U godišnjem finansijskom izvještaju politička stranka je iskazala ukupne rashode u iznosu od 178.799,44 KM.

## 2. PREDSTAVLJANJE POLITIČKE STRANKE

Naziv političke stranke je Naša stranka. Naša stranka je registrovana pod brojem: 065-0-Reg-08-001257 od 21.04.2008. godine, kod Općinskog suda u Sarajevu.

Sjedište političke stranke je u Sarajevu, ulica Jezero broj 8.

Za zastupanje stranke ovlašteni su Bojan Bajić, predsjednik i Fadil Šero, generalni sekretar Naše stranke.

Lice ovlašteno za podnošenje finansijskih izvještaja za 2009. godinu je Milena Božić.

Prema podacima iz godišnjeg finansijskog izvještaja za 2009. godinu, organizacionu strukturu Naše stranke čine:

- Glavni ured Sarajevo,
- Gradski odbor Mostar i
- 25 općinskih odbora.

### 3. OPIS REVIZIJE

**Predmet revizije** je godišnji finansijski izvještaj Naše stranke za 2009. godinu i to sljedeći organizacioni dijelovi:

- Glavni ured Naše stranke Sarajevo,
- Općinski odbor Naše stranke Tuzla,
- Gradski odbor Naše stranke Mostar,
- Općinski odbor Naše stranke Banja Luka,
- Općinski odbor Naše stranke Cazin i
- Općinski odbor Naše stranke Srebrenica

**Cilj revizije** je da revizoru omogući da izrazi mišljenje o tome da li je Naša stranka u izvještajnom periodu postupala u skladu sa odredbama Zakona o finansiranju političkih stranaka.

**Obim revizije** finansijskih izvještaja Naše stranke obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

### 4. PRETHODNE REVIZIJE

Služba za reviziju je izvršila pregled godišnjeg finansijskog izvještaja Naše stranke za 2008. godinu, nakon čega je izdat izvještaj o pregledu sa nalazima revizije, mišljenjem revizora i preporukom stranci, da treba postupati u skladu sa odredbama člana 6. i člana 11. stav (1) i stav (3) Zakona o finansiranju političkih stranaka.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2009. godinu, utvrđeno je da Naša stranka nije ispoštovala preporuke revizije, te da je i u 2009. godini postupila suprotno odredbama člana 6. i člana 11. stav (1) i (3) Zakona o finansiranju političkih stranaka.

### 5. NALAZI I PREPORUKE

#### 5.1. NALAZI

- a) **Na osnovu obavljene revizije godišnjeg finansijskog izvještaja za 2009. godinu i finansijske dokumentacije Naše stranke, utvrđeno je da je stranka prekršila odredbe člana 6. Zakona o finansiranju političkih stranaka<sup>1</sup>.**

Stranka u finansijskom izvještaju nije prijavila prilog fizičkog lica, koje je stranci pružalo besplatne usluge po osnovu Ugovora o volonterskom radu broj: 119/09, a koji se primjenjuje od 01.10.2009. godine.

---

<sup>1</sup> Ako ukupan iznos priloga jednog fizičkog ili pravnog lica iz člana 4. Zakona o finansiranju političkih stranaka premašuje 100,00 KM, taj prilog se mora unijeti u finansijski izvještaj u skladu sa članom 11. ovog zakona. U smislu člana 4. zakona, prilog podrazumijeva i besplatne usluge političkoj stranci.

Imajući u vidu odredbe Odluke o uslovima i načinu prijema pripravnika VII stepena stručne spreme u radni odnos u institucije BiH, pouzdano se može utvrditi da je mjesečna naknada za rad volontera u 2009. godini iznosila 300,00 KM<sup>2</sup>, te da je Naša stranka u skladu s time ostvarila prilog fizičkog lica u iznosu 900,00 KM koji nije prijavila u finansijskom izvještaju.

**b) Revizijom godišnjeg finansijskog izvještaja za 2009. godinu utvrđeno je da je Naša stranka prekršila odredbe člana 8. stav (1) Zakona o finansiranju političkih stranaka<sup>3</sup>.**

- Općinska organizacija Naše stranke Centar Sarajevo je na osnovu ugovora o zakupu poslovnih prostorija broj: 04-49-4-34/09, zaključenim dana 19.05.2009. godine sa Općinom Centar Sarajevo, koristio poslovni prostor površine 150 m<sup>2</sup>, po cijeni koja je ugovorena u iznosu od 1,00 KM po m<sup>2</sup>. Prema odluci o dodjeli u zakup poslovnih zgrada i prostorija Općine Centar Sarajevo broj: 01-49-1690/09 od 23.06.2009. godine („Službene novine Kantona Sarajevo“, broj 20/09), najniži iznos zakupnine u I zoni Općine Centar iznosi 20,00 KM po m<sup>2</sup>. Korištenjem poslovnog prostora u periodu od 01.07. do 31.12.2009. godine po cijeni koja je ispod cijene utvrđene navedenom odlukom, Naša stranka je ostvarila zabranjen prilog od Općine Centar u iznosu od 14.700,00 KM.
- Općinski odbor Naše stranke Ilijaš je na osnovu ugovora o davanju na korištenje poslovnih prostorija broj: 04/3-23-43/09 od 03.02.2009. godine, koristio bez naknade poslovni prostor površine 17,50 m<sup>2</sup> u vlasništvu Općine Ilijaš. Prema odluci o načinu i visini plaćanja zakupnine poslovnih prostora na području Općine Ilijaš broj: 01-I-02-189/00 od 17.02.2000. godine („Službene novine Kantona Sarajevo“, broj 2/00), najniži iznos zakupnine u II zoni Općine Ilijaš iznosi 8,00 KM po m<sup>2</sup>. Na bazi navedene odluke, utvrđeno je da je Naša stranka usljed neplaćanja zakupnine ostvarila zabranjen prilog u iznosu od 1.540,00 KM.
- Općinski odbor Naše stranke Ilidža je na osnovu ugovora o zakupu poslovnog prostora broj: 05-23-2116/09 od 07.10.2009. godine, koristio poslovni prostor površine 18,30 m<sup>2</sup>, po cijeni koja je ugovorena u iznosu od 2,00 KM po m<sup>2</sup>, odnosno 10% od početne cijene zakupa po m<sup>2</sup> koja iznosi 20,00 KM za extra zonu u kojoj se nalazi navedeni poslovni prostor. Korištenjem poslovnog prostora u periodu od oktobra do decembra 2009. godine, po cijeni koja je ispod početne, Naša stranka je ostvarila zabranjen prilog od Općine Ilidža u iznosu od 988,20 KM. Pored navedenog, stranka nije imala obavezu da plaća troškove električne energije, vode, centralnog grijanja, naknade za odvoz smeća i naknade za redovno održavanje zajedničkih dijelova zgrade i upravljanja zgradom.
- Općinski odbor Naše stranke Stari Grad Sarajevo je na osnovu Odluke o dodjeli na korištenje poslovnog prostora u ulici Štrosmajerova broj 1/II, broj akta: 02-49-538/09 od 04.11.2009. godine, koristio bez naknade poslovni prostor površine 9,05 m<sup>2</sup>. Prema odluci o dodjeli na korištenje poslovnih prostora i visini i načinu plaćanja zakupnine za poslovne prostore na kojima pravo raspolaganja ima Općina Stari Grad Sarajevo broj: 02-49-368/07 od 18.07.2007. godine („Službene novine Kantona Sarajevo“, broj 26/07) najniža visina zakupnine po m<sup>2</sup> za extra zonu iznosi 20,00 KM. Neplaćanjem zakupnine za vrijeme korištenja poslovnog prostora Naša stranka je ostvarila zabranjen prilog od Općine Stari Grad Sarajevo u iznosu od 362,00 KM.

---

<sup>2</sup> U skladu sa članom 6. tačka 5) Odluke o uslovima i načinu prijema pripravnika VII stepena stručne spreme u radni odnos u institucije BiH („Službeni glasnik BiH“, broj 52/05) volonter za vrijeme rada ima pravo na paušalnu naknadu od 300,00 KM mjesečno. U skladu sa Odlukom o izmjenama i dopunama Odluke o uslovima i načinu prijema pripravnika VII stepena stručne spreme u radni odnos u institucije BiH („Službeni glasnik BiH“, broj 102/09), volonteri visoke stručne spreme imaju pravo na naknadu u iznosu od 25% od osnovne plate stručnog saradnika, kao početnog mjesta visoke stručne spreme.

<sup>3</sup> Državni, entitetski i kantonalni organi, organi općinskih i mjesnih zajednica, javne institucije, javna preduzeća, humanitarne organizacije, preduzeća koja su po samoj svojoj djelatnosti isključivo neprofitna, vjerske zajednice, kao i privredna udruženja u kojima uloženi javni kapital iznosi najmanje 25% ne mogu finansirati političke stranke.

- Općinski odbor Naše stranke Vareš je na osnovu saglasnosti Općine Vareš broj: 02-269/09 od 05.06.2009. godine, koristio poslovni prostor površine 16 m<sup>2</sup> koji je u vlasništvu d.d. Autotrans Vareš, sa kojim je Općina Vareš sklopila ugovor o zakupu poslovnog prostora broj: 02-173/07 od 16.04.2007. godine. Predsjednik Općinske izborne komisije Općine Vareš je u aktu broj: 4/10 od 30.04.2010. godine koji je dostavljen na zahtjev Centralne izborne komisije BiH, naveo da je Općina Vareš platila u ime stranke Naša stranka zakupninu u periodu 01.07. - 31.12.2009. godine u iznosu od 450,00 KM, čime je stranka ostvarila zabranjen prilog od Općine Vareš.

**c) Na osnovu obavljene revizije godišnjeg finansijskog izvještaja i kontrole dodatne finansijske dokumentacije, utvrđeno je da Naša stranka nije postupala u skladu sa odredbama člana 11. stav (1) i stav (3) Zakona o finansiranju političkih stranaka.<sup>4</sup>**

- (1) Naša stranka nije uspostavila adekvatne evidencije o svojim prihodima i rashodima, čime je prekršila odredbe člana 11. stav (1) Zakona o finansiranju političkih stranaka.

U poslovnim knjigama stranka je prihode, rashode i promet novčanih sredstava po transakcijskim računima za svoja dva organizaciona dijela, koji je ostvarila u prethodnoj godini iskazala kao promet novčanih sredstava, te prihode i rashode iz 2009. godine.

- Za svoj organizacioni dio u Tešnju, Naša stranka je u poslovnim knjigama za 2009. godinu evidentirala promet po transakcijskom računu Raiffeisen banke broj: 1610400010980003 u iznosu od 575,01 KM, koji je ostvaren u 2008. godini. Istovremeno stranka je prihode ostvarene u 2008. godini i to: prihode od članarine u iznosu 375,00 KM i prihode od donacija u iznosu 241,00 KM evidentirala kao redovni prihod ovog izvještajnog perioda. Također, stranka je i troškove zakupnine za salu u iznosu 163,80 KM, troškove reprezentacije u iznosu 137,00 KM, trošak usluga reklame u iznosu 299,52 KM i proviziju banke u iznosu od 14,50 KM, koji su nastali u prethodnoj godini evidentirala kao troškove iz 2009. godine.
- Stranka je kod organizacionog dijela u Srebrenici evidentirala u poslovnim knjigama za 2009. godinu promet novčanih sredstava po transakcijskom računu Unicredit banke ad – Filijala Srebrenica broj: 5513121129747573 u iznosu od 620,00 KM, koji je ostvaren 2008. godine. Pored toga, stranka je prihod koji iz 2008. godine, ostvaren iz budžeta Opštine Srebrenica u iznosu od 628,00 KM iskazala kao prohod 2009. godine.

U svom knjigovodstvu stranka nema uspostavljene potpune evidencije o svim troškovima koji su nastali u 2009. godini. Stranka u svojim poslovnim knjigama, niti u godišnjem finansijskom izvještaju, nije evidentirala troškove zakupnine poslovnih prostora u iznosima koji su utvrđeni ugovorima o zakupu koje je stranka potpisala sa svojim zakupodavcima.

- Za organizacioni dio stranke u Bihaću ugovorom o najmu poslovnog prostora zaključenom dana 28.10.2008. godine na neodređeno vrijeme, utvrđena je zakupnina u iznosu od 3.600,00 KM. U poslovnim knjigama stranka je iskazala troškove zakupnine ovog organizacionog dijela samo za šest mjeseci i to u iznosu od 1.800,00 KM, koliko je platila zakupodavcu.

<sup>4</sup> U skladu sa odredbama člana 11. stav (1) Zakona o finansiranju političkih stranaka, sve političke stranke su obavezne da vode evidenciju o svojim prihodima i rashodima i da Centralnoj izbornoj komisiji BiH podnose finansijski izvještaj za svaku kalendarsku godinu (računovodstvenu godinu).

U skladu sa odredbama člana 11. stav (3) istog zakona, do 31.03. naredne godine političke stranke podnose finansijski izvještaj u formi koju odobri Centralna izborna komisija BiH. Centralna izborna komisija BiH je donijela Pravilnik o godišnjim finansijskim izvještajima političkih stranaka („Službeni glasnik BiH“ broj 61/06), kojim su utvrđeni sadržaj, forma, način i drugi detalji izvještavanja.

- Kod organizacionog dijela stranke u Gračanici, ugovorena zakupnina po ugovoru o zakupu broj 04-3085-I/2009 od 23.02.2009. godine, iznosi 2.200,00 KM, dok je stranka troškove zakupnine iskazala u iznosu od 1.760,00 KM, odnosno manjem iznosu za 440,00 KM.
- Organizacioni dio stranke u Mostaru po osnovu ugovora o zakupu zaključenog 16.12.2008. godine na neodređeno vrijeme, ostvario je troškove zakupnine u 2009. godini u iznosu od 4.200,00 KM. Stranka je u poslovnim knjigama i godišnjem finansijskom izvještaju troškove zakupnine u Mostaru iskazala u iznosu od 700,00 KM.

U poslovnim knjigama Naša stranka je iskazale troškove u iznosu od 39.500,00 KM i za iste navela da su to autorski honorari u iznosu od 35.650,00 KM i ugovori o djelu u iznosu od 3.850,00 KM.

- Uvidom u ugovore o autorskom djelu koje je stranka tokom 2009. godine zaključila sa predsjednikom stranke (3 ugovora), sa generalnim sekretarom stranke (6 ugovora), osobom ovlaštenom za podnošenje finansijskih izvještaja (5 ugovora), glasnogovornikom stranke (6 ugovora) i pet ugovora sa drugim fizičkim licima, utvrđeno je da su to uglavnom administrativno-tehnički poslovi (priprema materijala za sjednicu i izrada zapisnika), priprema saopštenja za javnost, izrada programa rada stranke, analiza rada stranke i njenih organizacionih dijelova, analiza izbornih rezultata, izrada programa edukacija članova stranke i sl.

U Zakonu o autorskom pravu i srodnim pravima u Bosni i Hercegovini („Službeni glasnik BiH“ broj: 7/02, 32/02 i 76/06), odnosno članu 6. stav (1) Zakona je propisano da se autorskim djelom smatra individualna duhovna tvorevina iz oblasti književnosti, nauke, umjetnosti i drugih oblasti stvaralaštva.

Troškovi usluga koje je stranka u svojim poslovnim knjigama i finansijskom izvještaju iskazala kao autorske honorare, ne mogu se smatrati autorskim djelom, a samim time ni naknada za iste autorskim honorarima. Navedene troškove stranka je trebala klasifikovati po vrstama usluga vezanim za redovne aktivnosti stranke.

- Uvidom u ugovore o djelu utvrđeno je da su to usluge održavanja poslovnih prostorija stranke, koje je izvršilo fizičko lice.

Stranka je u skladu sa odredbama člana 11. stav (1) Zakona o finansiranju političkih stranaka bila obavezna izvršiti klasifikaciju troškova po vrstama usluga, a ne prema načinu na koji su usluge pružene.

- (2) Naša stranka finansijski izvještaj nije sačinila u skladu sa Pravilnikom o godišnjim finansijskim izvještajima političkih stranaka, čime je prekršila odredbe člana 11. stav (3) Zakona o finansiranju političkih stranaka.

U finansijskom izvještaju koji je podnijela Centralnoj izbornoj komisiji BiH stranka nije iskazala dva transakcijska računa.

- Kontrolom poslovnih knjiga i finansijske dokumentacije vezane za promet transakcijskih računa političke stranke, koji se iskazuje na obrascu 2. finansijskog izvještaja (Pregled prometa svih transakcijskih računa političke stranke), utvrđeno je da ova politička stranka nije iskazala transakcijski račun otvoren kod Raiffeisen banke dd Sarajevo za valutu EUR, broj: 503012000-06000019058. Uvidom u izvode sa navedenog transakcijskog računa, utvrđeno je da je stranka ostvarila priliv sredstava u iznosu od 131,00 EUR, u protuvrijednosti 256,21 KM. Navedena sredstva Naša stranka je ostvarila po osnovu članarina od članova koji su privremeno boravili u inostranstvu.



- Revizijom je utvrđeno da stranka na obrascu 2. Finansijskog izvještaja nije iskazala transakcijski račun broj 1610200054110190 koji je njen organizacioni dio u Konjicu otvorio 11.11.2009. godine kod Raiffeisen banke dd Sarajevo. Na pomenutom računu stranka, odnosno njen organizacioni dio u Konjicu nije ostvario nikakav promet.

U skladu sa odredbama člana 11. Pravilnika o godišnjim finansijskim izvještajima političkih stranaka, Naša stranka je bila obavezna da u finansijskom izvještaju prijavi transakcijske račune za sve organizacione dijelove stranke skupa sa: podacima o broju računa, nazivu banke, prometu računa i stanjem računa na početku i na kraju izvještajnog perioda.

- U finansijskom izvještaju Naša stranka nije iskazala troškove zakupnine u iznosu od 5.740,00 KM, od čega zakupninu za organizacioni dio u Bihaću 1.800,00 KM, organizacioni dio u Gračanici 440,00 KM i za organizacioni dio u Mostaru 3.500,00 KM, čime je prekršila odredbe člana 21. Pravilnika o godišnjim finansijskim izvještajima političkih stranaka. U skladu sa odredbama Pravilnika stranka je bila obavezna iskazati sve režijsko-administrativne troškove koje je ostvarila u izvještajnom periodu, bez obzira da li su oni plaćeni ili ne.
- Stranka u finansijskom izvještaju nije iskazala obaveze za neplaćenu zakupninu u iznosu od 5.740,00 KM, proisteklu iz ugovora o zakupu za organizacione dijelove stranke u Bihaću, Gračanici i Mostaru, čime je prekršila odredbe člana 23. Pravilnika o godišnjim finansijskim izvještajima političkih stranaka.
- U finansijskom izvještaju, na obrascu 4-1 (Režijsko-administrativni troškovi), Naša stranka je kao autorske honorare iskazala troškove u iznosu od 35.650,00 KM i troškove u iznosu od 3.850,00 KM iskazala je kao ugovor o djelu.

U skladu sa odredbama člana 11. stav (3) Zakona o finansiranju političkih stranaka i odredbama člana 21. Pravilnika o godišnjim finansijskim izvještajima političkih stranaka („Službeni glasnik BiH“ broj 61/06), politička stranka je bila obavezna da u finansijskom izvještaju troškove iskaže po vrstama troškova, a ne prema načinu na koji je stranci izvršena usluga.

## 5.2. PREPORUKE

*Preporučuje se Našoj stranci da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:*

- *da u finansijskom izvještaju koji dostavlja Centralnoj izbornoj komisiji BiH prijavljuje sve priloge čiji je iznos veći od 100,00 KM*
- *da se ne finansira iz izvora koji su političkim strankama zabranjeni članom 8. Zakona o finansiranju političkih stranaka.*
- *da u svojim poslovnim knjigama uspostavi potpune evidencije o svim prihodima i rashodima*
- *da finansijske izvještaje podnosi Centralnoj izbornoj komisiji BiH u skladu sa odredbama člana 11. stav (3) Zakona o finansiranju političkih stranaka i u formi propisanoj Pravilnikom o godišnjim finansijskim izvještajima političkih stranaka.*

## **Komentar**

Naša stranka se nije očitovala na nalaze revizije i mišljenje revizora dato u preliminarnom izvještaju o reviziji godišnjeg finansijskog izvještaja za 2009. godinu, koji joj je dostavljen 02.02.2011. godine.

Zahvaljujemo se osobi ovlaštenoj za podnošenje finansijskih izvještaja Naše stranke na korektnoj saradnji tokom obavljanja revizije finansijskih izvještaja.

Mr. Hasida Gušić, Šef Službe za reviziju, revizor

Amela Batuša, pomoćnik revizora